



SAKSFRAMLEGG

Saksnr:	Utval:	Dato
	Formannskap/plan- og økonomiutvalet	
	Kommunestyret	
	Levekårsutvalet	

Sakshandsamar:	Arkiv:	ArkivsakID
Ann Kristin Bolstad	FA-F40, TI-&20	21/1176

VURDERING AV INTERKOMMUNALT SAMARBEID OM BARNEVERNSTENESTE

Kommunedirektøren sitt framlegg til vedtak:

Kommunedirektøren tilrår å halde fram avtalen om interkommunalt vertskommunesamarbeid med Osterøy kommune om barnevernsteneste, der Osterøy er vertskommune.

Saksopplysningar:

Samandrag/konklusjon (kort om saka)

Formelt grunnlag

I møte 05.04.2022, sak 38/2022 - FORSLAG OM AVTALE OM ADMINISTRATIVT VERTSKOMMUNESAMARBEID GJELDANDE BARNEVERNSTENESTA - ber kommunestyret om «at ein får vurdert samarbeidet og førebur sak til kommunestyret 13. desember 2022, med tilråding om å fortsette eller seie opp samarbeidsavtalen. I ein eventuell oppseiingsperiode skal ein utgreie alternativer til vedteken modell, inkludert moglegheit for at Vaksdal kommune får det administrative ansvaret for barnevernstenesta.»

Bakgrunn for saka

Vaksdal kommune har sidan 1. juli 2022 hatt avtale om vertskommunesamarbeid med Osterøy om barneverntenesta.

Kommunestyret i Vaksdal gav administrasjonen fullmakt til å finna ei utforming på namnet for det interkommunale barnevernet. Dette skulle ivareta behovet for å identifisera barnevernet på vegne av Vaksdal og Osterøy kommunar. Barneverntenesta på Osterøy har i prosess med dei tilsette foreslått namnet Sørkjorden barnevern.

Osterøy barnevern er leia av barnevernsléiar Jannicke Sandvik. Osterøy barnevernteneste er samlokalisert med tenester som skal bistå barn og unge i alderen 0-18 år og deira familie på Familiens hus i Fotlandsvegen på Lonevåg. Tenesta disponera òg eigna kontorlokaler i heradshuset på Dale, 5. etg. Både leiar og tilsette nyttar desse lokala jamleg. Det er viktig for Vaksdal kommune at innbyggjarar i Vaksdal kan møte barnevernet i eigen kommune. Når barnevernet deltek i ansvarsgruppemøter/samarbeidsmøter med ulike tenester møter dei der tenestene driftar/barna oppheld seg, der dette er naturleg.

Innbyggjarane i Vaksdal, Modalen og Osterøy er tilknytt Barnevernsvakten i Bergen. I tillegg vil Vaksdal snart vera del av nasjonal portal for bekymringsmelding. Når kommunen tek i bruk Nasjonal portal for bekymringsmeldingar, kan både privatpersoner og offentlig tilsette sende bekymringsmelding digitalt til barnevernet.

Kommunane har jamlege møtepunkt på kommunedirektørnivå saman med barnevernsleiar.

Tenesta har 12 tilsette. Tenesta er organisert i team undersøking/tiltak og team omsorg (fosterheim). Dette er ei prosjektorganisering med evaluering om eit år. Organiseringa vert kontinuerlig vurdert opp mot nye lovkrav og ansvar på kommunalt nivå, særleg med tanke på fosterheimsområdet. Tenesta har tilsett merkantil ressurs etter oppstarten i haust.

Modalen kommune har òg inngått samarbeidsavtale med Osterøy kommune på likelydande vilkår. Vaksdal kommune har framleis sitt område for journal/sakshandsaming og arkiv; Visma familie, som eigen database. All post til barnevernet vert handtert av postmottak i Osterøy kommune og ført i Visma familie.

Leiing i Vaksdal kommune, Osterøy kommune og Modalen kommune deltek saman med barnevernsleiar Jannicke Sandvik i regjeringa sitt Barnevernløft i regi av KS. Andre samlinga var gjennomført november 22. Leiing i Vaksdal bistår òg på systemnivå på initiativ frå barnevernsleiar. Typiske område er tiltaksrapportering/system, internkontroll, ROS, avvik og generell støtte.

Tenesta har knytta til seg KS-konsulent i det vidare utviklingsarbeidet. KS-konsulent skal saman med dei tilsette i barnevernstenesta sjå på organiseringa, og korleis denne sikrar ei teneste som møter behova til kommunane (barna og familieane). 8 av 9 barneverntenester i Noreg har etter tilsyn vist utfordringar knytt til å organisera på ein måte som sikrar forsvarlege teneste, og sikrar styring og leiing. Dette er bakgrunnen til at tenesta tok kontakt med KS-konsulent på dette området.

Osterøy barnevern levera tilstandsrapportar etter lovkrav til kommunestyra i dei tre kommunane. Tilstandsrapportane skal gje kommunestyra innsikt i tilstand, utvikling og viktige problemstillingar i barnevernet for å kunne gjera betre prioriteringar og gje kommunestyra betre kontroll over tenesta (bvl § 2-1 nytt åttende ledd).

Vaksdal kommune er i slutfasen av arbeidet med Vaksdal kommune sin tverrfaglege plan (løypemelding gitt i levekår i september). Barneverntenesta har delteke i dette arbeidet gjennom barnevernsleiar Jannicke Sandvik. Eit av dei førande prinsippa i ny oppvekstreform er at barnevernet ikkje skal påta seg ansvar for tenester som andre velferdstenester har. Dette krev tett kontakt, koordinering og tverrfagleg samarbeid mellom velferdstenestene og barnevernet. Det er difor sentralt at barnevernstenesta deltek i det overordna tverrfaglege teamet.

Vurdering og konsekvensar

Kommunedirektøren vurderer at tenesta arbeider godt med kvalitetsutvikling i barnevernet. Ein opplever ei open og tilgjengeleg teneste som svarar raskt ved førespurnad og på våre behov for informasjon. Ein opplever òg at tenesta fungerer som ein lærande organisasjon og som søker ekstern kompetanse for å belyse interne læringspunkt.